

محمد كمال جابر

ستات لا يدخلون الجنة

مسرحية كوميدية من سبع لوحات

مؤسسة يسطرون للطباعة والنشر والتوزيع



رئيس مجلس الإدارة

عماد سالم

المدير العام

أحمد فؤاد الهادي

مدير الإنتاج

أحمد عبد الحليم

الطبعة: الأولى

الكتاب: ستات لا يدخلون الجنة

المؤلف: محمد كمال جابر

تصنيف الكتاب: مسرحية

التصميم والإخراج: م/مارك منير

المقاس: ١٤ × ٢٠

رقم الإيداع: ٢٣٠٧٤ / ٢٠١٨

الرقم الدولي: 5 - 811 - 776 - 977 - 978

العنوان: المكتبة والمطبعة: ٣ ش صفوت - محطة المطبعة شارع الملك فيصل - الجيزة

التليفون: ٠١١٥٧٧٦٠٠٥٢ - ٠١٢٢٩٣٠٠٠٢٩

Email: yastoron@gmail.com

موقعنا على الفيس بوك: مؤسسة يسطرون لطباعة وتوزيع الكتب

جميع الحقوق محفوظة للمؤلف

بِسْمِ اللَّهِ الرَّحْمَنِ الرَّحِيمِ

اللوحة الأولى

المشهد البروجرجى

المسرح مظلم تماما بعد موسيقى الأوفرتير والستار مازال مغلقاً، يبدأ هذا المشهد فى منتصف مقدمة المسرح تضاء بؤرة إضاءة على منى وأحمد ويدور بينهما الحوار التالى:

أحمد : أيوة يا يامننى أنا بحبك وهفضل أحبك العمر كله
منى : وأنا كمان يا أحمد بحبك وهفضل أحبك العمر كله
أحمد : عاهدينى يا منى.
منى : عاهدتك يا أحمد - بس على إيه يا حبيبى؟
أحمد : إن مافيش حاجة تفرق بينا ولا حتى الموت.
منى : ولا حتى الموت يا حبيبى يقدر يفرق بينا.
أحمد : بابا راجع من السفر النهاردة وهقوله إنى إنى
منى : إنك إيه يا أحمد: بجد هتقولوا يا أحمد
هتقولوا - هتقولوا إيه يا حبيبى.
أحمد : هقولوا ان أنا أنا أنا عايز عايز عايز.
منى : هتقولوا عايز إيه يا أحمد.

أحمد : الله يا منى ماتكسفنيش بقى.

بلاك

(ثم تضاء بؤرة إضاءة فى أقصى يمين مقدمة المسرح مع استمرار غلق الستار لنجد أحمد ووالده).

أحمد : يا بابا والله بحبها ومش قادر أبداً على بعدها.

والد أحمد : ماتستعبطش يا أحمد إنت عارف كويس إن ديه. بالذات مستحيل يعنى مستحيل.

أحمد : يا بابا ما هو مش ممكن الحكاية القديمة اللي بينك وبين أبوها تبقى هى السبب فى رفضك جوازى من منى حرام عليك بقى - طب ينفع كدة

والد أحمد : آه ينفع - بس هه

بلاك

(ثم تضاء نفس بؤرة الإضاءة مرة ثالثة فى أقصى يسار المسرح على منى ووالدها)

منى : يا بابا صدقتى أحمد إنسان كويس وغير أبوه خالص

- والد منى : أى واحد فى الدنيا يبقى مناسب ليكى إلا ابن
الراجل ده.
- منى : طب وأحمد ذنبه إيه بس
- والد منى : ذنبه إنه يبقى ابن الراجل اللى حطم حياتى
وضيع مستقبلى
- منى : (تبكى) يعنى بقى علشان كان بيغلبك فى
الكرة الشراب زمان تعمل فيه كدة أنا وأحمد
- والد منى : لولا أبو أحمد كان زمانى دلوقتى رونالدو، ولا
ميسى، ولا حتى محمد صلاح.
- منى : يا بابا حرام عليك ما ضيعش مستقبلى
- والد منى : وهو أبوه ليه ضيع مستقبلى هه ليه
- منى : يعنى مفيش فائدة
- والد منى : آه بس هه

بـلاـك

- ثم تضاء نفس البؤرة فى منتصف المسرح ومازال الستار مغلقاً
- منى: وبعدين يا أحمد هنعمل إيه
- أحمد : مش عارف يا منى: أبوكى وأبويا مصممين
يعكزنوا علينا حبنا.

- منى : أنا لو رسيت هموت نفسى ولا كونش لحد
تانى غيرك يا أحمد
- أحمد : وأنا كمان هموت نفسى ومتكونيش لحد تانى
غيرى يا منى
- منى : (تفكر) إنت مش ملاحظ يا أحمد إن حكايتنا
هى نفسها قصة روميو وجوليت
- أحمد : آه والله صح يا منى ديه نفس حكاية روميو
وجوليت - قصدك يعنى إن مؤلف المسرحية
ضحك علينا وعلى الناس وألف مسرحية متألفة
قبل كدة يعنى إدانا مسرحية بايته
- منى : تفتكر روميو وجوليت لما إنتحروا علشان أهلهم
رفضوا جوازهم كانوا عارفين إنهم بانتحارهم
هيخلدوا قصة حبهم.
- أحمد : إيه ده هما روميو وجوليت إنتحروا
- منى : وكيلوباترا وانطونيو تفتكر برضوا فكروا كده
- أحمد : أنا أعرف كيلوا باترا - مين بقى انطونيو ده
- منى : وقيس وليلى - وحسن ونعيمة - هما ماتوا
بس حبهم فضل وعاش
- أحمد : على رأيك الحى أبقى من الميت - (يفكر) أوعى

يكون قصدك إننا نموت نفسنا زيهم.
منى : وتبقى قصة حبنا أحسن من كل دول
أحمد : والناس كلها تتكلم عننا وعن حبنا ويعملوا
سجاير على اسمنا - اشرب منى وأحمد وحب
من نغشيشك ويحطوا على العلبة صورتنا واحنا
فى الإنعاش.
منى : هنبقى زى عنتر وعيلة وقيس وليلى.
أحمد : إنت شايفة كده يعنى ما عندكيش حل تانى؟
منى : ويخلد التاريخ حبنا ويعرف أبوك وأبويا إنهم
ما قدروش يغلبوا حبنا (تفكر) أيوه يا أحمد
احنا إلاتنين ننتحر فى وقت واحد ونكتب ورقة
نقول فيها
(منى وأحمد معاً - نموت - نموت - ويعيش حبنا)

بـلاـك

(موسيقى)

ومازال الستار مغلقاً ويضاء بؤرتين للإضاءة الأولى فى
أقصى يمين مقدمة المسرح والأخرى فى أقصى يسار مقدمة

المسرح ونجد فى أقصى اليمين أحمد وأمامه حبل على شكل مشنقة وفى أقصى اليسار منى وفى يدها زجاجة صغيرة مكتوب عليها سم.

أحمد : (يحاول وضع رأسه داخل المشنقة) أجمل

حاجة فى الدنيا إن الواحد يموت وحبه يعيش

منى : بكرة الجرايد كلها تحط صورتى صفحة أولى

وتكتب تحتها بالبند العريض جوليت القرن

العشرين - منى تنتحر من أجل أن يعيش حبها

أحمد : أحمد روميو القرن العشرين ينتحر من أجل

جوليت

منى : (تشرب السم) الوداع يا أحمد، الوداع يا

غرامى.

أحمد : (واضعاً رأسه داخل الحبل) الوداع يا منى

الوداع يا حبى الوحيد

منى : (ملقاة على الأرض بعد أن شربت السم) مع

السلامة يا أحمد أشوفك فى الجنة يا حبيبى

(تتلاشى بؤرة الإضاءة الخاصة بمنى مع استمرار بؤرة

إضاءة أحمد).

أحمد : (يحاول أن يشنق نفسه فلا يستطيع) ياه الحبل
ده ماله ناشف ليه كده وبيعور، أحسن حاجة
الواحد يشوفله موته تانية ماتكنش بتعور -
فكرة أجيب سم من الأجزخانة أشربه، وتبقى
موته رومانكية زى روميو ما عمل (ينزل من
على الكرسي وتتلاشى الإضاءة تدريجياً) ز

بلاك

(موسيقى)

اللوحة الثانية

يفتح الستار لنجد ديكور عبارة عن خلفية بألوان سماوية مع تصاعد لأدخنة قليله من الأرضية ليشعر المتفرج كأنه قد صعد للسماء، ونجد فى يمين المسرح يافطة عليها سهم فى اتجاه اليمين وأخرى بسهم فى اتجاه الشمال مكتوب على سهم اليمين الجنة، وثم بعدها باب ضخم عليه خيوط عنكبوت كأنه مهجوراً ولم يدخله أحد وعليه يفظ صغيرة تعلن عن قصور وفيلات وشقق للتمليك أو الإيجار.

وكتب أسفل السهم فى اتجاه اليسار جهنم، وفى يسار المسرح باب ضخم يتراحم عليه ناس كثيرة يرتدون ملابس بيضاء دون أكمام أو جيوب على شكل كفن، منهم الجالس ومنهم الواقف، ومنهم من يقف أمام لوحة إعلانات معلق فيها أوراق كثيرة كأنها نتيجة امتحان، ومنهم من يأكل من حلة أمامه ثم يأتى من يقف على باب الجهة اليسرى ويئده على عدة أسماء من ورقة معه ومن يسمع اسمه من الناس يرد ثم يدخل الى الباب ثم تدخل منى وتقف أمام هذا الزحام فى تعجب واستغراب شديد.

منى : إيه الزحمة ديه وإيه المكان الغريب ده (تلتفتت يميناً ويساراً حتى يقترب منها أحد الأشخاص)

- بس - بس - بس - إنت - أيوه أنت يا حضرة ممكن
الشخص : (يلتفت يميناً ويساراً ثم يشأور على نفسه)
أنا - قصدك أنا ولا حد تانى
منى : أيوة أنت - أنت يا أخى (يلتفت الشخص مرة
ثانية يميناً ويساراً) إنت - إنت.
الشخص : أوامر يا جميل - أمرك يا طعم - طلباتك يا غسل
منى : إحنا فين
الشخص : نعم يا ختى مش عارفة إحنا فين - آمال
جيتى هنا إزاي
منى : مش عارفة جيت إزاي - أصل أنا آخر حاجة
فاكرها إنى شربت سم - وبعد كدة حصل إيه
مش عارفة.
الشخص : يا أنسة إنتى جيتى فى المكان اللى كل واحد
بيجيه بعد ما بيشرب السم.
منى : يعنى إيه - هى ديه مستشفى؟
الشخص : لا طبعاً مش مستشفى
منى : ليه هو الواحد لما بيشرب السم مش بيودوا
المستشفى

- الشخص : أيوه، يا إما يودوا المستشفى - يا إما يجى على
هنا من غير ما حد يوديه
- منى : قصدك يعنى إن أنا ما رحتش المستشفى وووووو
الشخص : (يؤمى برأسه بمعنى الموافقة)
- منى : يعنى أنا دلوقتى مى مى مى
الشخص : (يهز رأسه بالموافقة)
- منى : (تقرأ يافطة جهنم) واحنا دلوقتى واقفين على
باب جه - جه - جه.
- الشخص : (يهز رأسه بالموافقة)
- منى : (صارخة) يا نهار أسود يعنى أنا مت ودخلت
النار
- الشخص : مت آه - ولكن دخلت النار ما تتفأليش قوى
كدة - إنتِ فاكرها سهلة.
- منى : نعم يا حبيبي هو فيه حد عايز يدخل النار
- الشخص : يا حبيبتي أنا بقالى ست شهور واقف الوقفة
ديه علشان أحجز حتى أوضة وصالة ومش عارف
- منى : ليه هى جهنم كمان بالحجز - أف أيه الحر
ده - هى الدنيا ليه حر قوى كدة.

- الشخص : أصل التكيف عطلان (لنفسه) دى باين عليها
مجنونة - اسمعى يا ست إنت.
- منى : آنسة من فضلك.
- الشخص : ست - آنسة هنا ما يفرقش يا ماما الجو هنا
لازم يكون حر أمال لما تخشى جوه هتعملى إيه
وتقولى إيه (يأتى اليهم شخص ٢ ويتحدث مع
الشخص).
- شخص ٢ : إلاقولى يا حضرة هيندهوا أسماء تانى النهاردة
ولا خلاص على كدة
- الشخص : هى الساعة كام معاك دلوقتى
- شخص ٢ : داخله على الساعة اتنين آهه
- الشخص : يبقى خلاص هيشطبوا وهيكملوا بكرة
- شخص ٢ : بكرة تانى ده أنا بقالى سنة على الحال ده كل
يوم اجى اقف الوقفة ديه واسمى مايتندهش
- منى : بقالك سنة كل يوم تيجى علشان تخش النار
- شخص ٢ : وهما عايزين يخلصوني - الأول قالولى إملا
إلاستمارات، وبعد ما ملتها قالولى هات عليها
توقيع اتنين حانوتية، وبعدين هات شهادة

- الوفاة، وبعدين عملوا كشف طبي وتحاليل
واختبارات رياضية، ومع إنى نجحت لكن بقالى
سنة مستنى دورى وما جاش
- الشخص : أصلهم بيقولوا إن لسا فى مبانى ماخلصتش
وفى مبانى بعد ما خلصت اتهدت
- منى : يا سلام حتى الحركات القرعة ديه موجودة هنا
الشخص : يعنى تفتكرى يا آنسة النار هييجيها مين إلا
بتوع الحركات القرعة ديه.
- شخص ٢ : مفيش فايده أروح بقى وأبقى أجي بكرة.
منى : وأنا بقى يا ترى هستنى زيه كدة سنة برضه
الشخص : إنتى شفتى اسمك فى الكشف.
منى : كشف إيه.
- الشخص : كشف اللى هيخشوا جهنم.
منى : وهيا ليها كشف كمان.
الشخص : لا إنتى فاكرة إن أى حد بيخش هنا.
منى : نعم يا حبيبى.
- الشخص : يا آنسة إنت هنا هتلاقى الناس المهمة والشخصيات
اللى هيا.

- منى : يعنى إيه مش فاهمة.
- الشخص : يعنى كل واحد هنا حسب مقامة فى ناس
هتسكن فى قصور، وناس هتسكن فى فيلات،
وناس فى شقق اسكان متوسط وهكذا.
- منى : يا سلام وأنا بقى هسكن فين.
- الشخص : تشوفى الأول اسمك نازل فى الكشف ولا لأ
- منى : وبعدين
- الشخص : وبعدين حسب عملك فى الدنيا هيتحدد
مستوى إسكانك - معاكى واسطة.
- منى : نعم يا حبيبي - واسطة علشان أسكن فى
جهنم؟
- الشخص : آه يا ختى واسطة علشان تسكنى فى جهنم -
واحد قريبك يكون مهم، ومات قبلك بفترة اللي
زى ده يخدمك حلو قوى.
- منى : لا ما عنديش واسطة ---- أشوف اسمى فين؟
- الشخص : الكشف آهه متعلقة هناك على الباب (تتجه
منى إلى الكشف لتقرأها بينما يأتى شخص ٣
للشخص).

- شخص ٣ : إلا قولى يا حضرة متعرفش العنوان ده ألاقية فين.
الشخص : (يأخذ من الورقة ويقرأها) ياه وإنت إيه اللى
جايك هنا ده العنوان ده فى حطة تانية بعيدة عن
هنا خالص - هناك
- شخص ٣ : ديه عالم معندهاش ضمير، ما أنا رححت هناك
ووصفولى على هنا - يعنى هرجع تانى
الشخص : (منى تحضر) هه لقيتى اسمك - رقمك كام
منى : لا ملقتيهوش
الشخص : بصيتى كويس
منى : ايوه وقريت الكشف كله، اسمى مش فيه.
شخص ٣ : ياسلام وإنت كمان يا شابة مش لاقية العنوان
وتيايه زى حالاتى
منى : لا أنا مش لاقية اسمى فى الكشف
الشخص : مش ممكن ديه بقالها أكثر من ميت سنة
ماحصلتش.
- منى : هيه إيه اللى محصلتش؟
الشخص : إن يطلع حد من الدنيا واسمه مش فى الكشف
منى : والكلام ده بقى معناه إيه.

- الشخص : معناه السعد والهنا - معناه الجنة ونعيمها
منى : (مسرورة) قصدك إني مش هخش النار
الشخص : طبعاً مدام اسمك مش فى النار - يبقى مش
هتخشى النار
منى : يعنى أنا هخش الجنة.
الشخص : غريبة دى بييجى من ميت سنة واكثر ما حدش
داخلها.
منى : معلش أصل أنا طيبة وعمري ما أذيت حد.
الشخص : جتنا النيله فى حظنا الهباب ده احنا حتى
النار مش عارفين نخشها
منى : إلا قولى يا حضرة والجنة برضه زحمة كدة
ولازم استنى
الشخص : زحمة إيه يا آنسه ما هي فاضيه أهى قدامك -
هو فى حد بييجى عندها أصلاً - يلا بينا
منى : على فين.
الشخص : هوصلك بنفسى لحد هناك وأملى عينى ببابها
منى : يلا بينا (أثناء هذا الحوار يتجمع الناس حولهم
ثم يتجهون معهم حتى باب الجنة بهرج ومرج)

- الشخص : (يخبط على باب الجنة بشدة) افتحوا يا عالم،
افتحوا يا ملايكة فى واحدة هنا داخله عندكم
(يستمر فى الخبط والمناداه حتى يفتح الباب
رجل ضخم ذو لحية وشارب أبيض).
- الحارس : (بصوت جاهورى) (ويتشاءب) إيه فى إيه
بتخبط ليه - بتصحينى من النوم ليه
- الشخص : الست ديه اسمها مش موجود فى النار يبقى
اسمها عندكم.
- منى : ما أنا أصلى طيبة وعمرى ما أذيت حد.
- الحارس : شفت الكشف كويس بتاع النار
منى : أيوه وملقتيش اسمى فيه.
- الشخص : ومدام اسمها مش فى كشف النار تبقى أكيد
اسمها عندكم.
- الحارس : هو كلامك منطقى - بس مفكرش إن الكشف
عندى فيه ستات.
- منى : ليه بقى هما الستات ما بيدخلوش الجنة.
- الحارس : عمومًا الكشف آهه(يخرج من جيبه ورقة
صغيرة جدا) اسمك إيه يا بنتى منى - منى.

الحارس : منى - منى - منى - منى - منى اسمك مش
عندنا يا ست.

منى : يعنى إيه هنام فى الشارع ولا إيه.

بلاك

(يضاء المسرح على ذات الديكور السابق مع بعض
الإختلافات البسيطة، ونجد منى فى حالة إنتظار وتوتر
تنتظر شخصاً معيناً ثم يدخل الشخص).

منى : هه عملت إيه لقيته؟

الشخص : دنا قلبت الآخرة عليه بس ملقتهوش.

منى : مش ممكن، ده إنتحر معايا فى نفس اليوم
والساعة والدقيقة.

الشخص : يا آنسة أنا متأكد إنه ماجاش هنا أنا لفيت
عليه إلاخرة كلها وكمان راجعت كل أسماء
الميتين اللى طلعوها من ساعة ما جيت إنت
لغاية دلوقتى.

منى : أمال يبقى راح فين بس؟

الشخص : معرفش بس هو ما فيش غير أمل أخى.

- منى : إيه هو - قول قوام ربنا يخليك.
الشخص : ربنا يخلينى - طيب - شوفى يا ستى إحنا متفقين إن اللى ينتحر يا إما يجى هنا.
- منى : أيوه يا اما يروح المستشفى
الشخص : بالظبط وده اللى أنا عملته كلفت واحد صاحبنى يقف على خط وارد المستشفيات يسأل كل اللى طالعين من هناك على واحد اسمه أحمد إنتحر ولسا فى المستشفى
- منى : وهم وارد المستشفيات دول بيعرفوا كل اللى فى المستشفيات واللى فى الدنيا
الشخص : طبعًا يا آنسه مش روحهم سارحة طول الليل وبيتعرفوا على بعض - (يدخل شخص ٢) اهه صاحبنى جه آهوه.
- منى : هو ده - مش ده اللى كان تايه من شوية
الشخص : ما كلنا بنتوه - جت عليه هو - هه عملت إيه وصلت لنتيجة.
- شخص ٢ : وهو أنا همدت خالص - من ساعة الست منى ما حكتلنا على حكايتها وهى صعبانة عليه خالص،

ورحت زى ما قلتلى على خط وارد المستشفيات
وسألت كل اللى جه منهم وكلهم أكدولى إنه اللى
اسمه أحمد ده ما إنتحرش ولا دخل المستشفى فى
التاريخ اللى إنتم قولتولى عليه.

منى : يعنى إيه مش ممكن أبداً - ده لازم يكون إنتحرش

شخص ٢ : صدقيني يا بنتى - أحمد ما إنتحرش - على

العموم يا خبر بفلوس بعد دقيقة واحدة هيبقى
ببلاش - أول ما ييجى صاحبي اللى بعته يسأل
فى إدارة الأحياء.

منى : إدارة الأحياء - وديه بتاعة إيه ديه.

الشخص : ديه إدارة تحريات بنعرف منها أخبار الناس

اللى عايزين نطمن عليهم فى الدنيا

منى : يعنى هتدلنا على أحمد: يا حبيبي يا أحمد يا

ترى إنت فين يا أحمد

شخص ٢ : وادى صاحبي وصل آهه (يدخل شخص ٣) هه

عملت إيه.

شخص ٣ : استنى يا أخى لما أخذ نفسى.

منى : لسا هتاخذ نفسك طمنى بسرعة أحمد عايش

فى الدنيا ولا إنتحر؟

شخص ٣ : التقرير اهه أنا جبته معايا.

الشخص : (يخطف التقرير من يد شخص ٣ ويقراه

بصوت عالى) من إدارة الأحياء قسم التحريات

بشأن الطلب المقدم من سيادتكم عن حالة المذكور

اعلاه نفيديكم بالآتى أفادت التحريات الدنيوية

بأن المذكور لم ينتحر، وقد لقب فى الدنيا باسم

أحمد روميو، وأصبح من الشخصيات الشهيرة

بسبب إنتحار إحدى الفتيات الغيبات بسبب

حبها له وتدعى منى، والتي لقيت باسم منى

جوليت- أما عن حالة المذكور الصحية فهو

بصحة جيدة ويتمتع بشهرة عريضة وأصبح فتى

احلام كل النساء العذارى منهم والمتزوجات -

إنتهى التقرير وسوف نخطرکم بفاتورة الحساب

: مش ممكن - الكلام ده مستحيل - مستحيل

- أحمد ما يعملش كدة أبدًا - الكلام ده مش

مضبوط - ورينى التقرير ده (تخطف الورقة من

الشخص وتقرأها)(ثم تستمر فى البكاء) الخاين

منى

- الجبان - ضيعنى وضع مستقبلى فى الدنيا
والآخرة - جبان - جبان.

الشخص : ما تعيطيش يا منى ده إنسان ما يستهلش حبك
شخص ٢ : ده مش إنسان ده حيوان - اللى يستغل إنتحار
إنسانة علشان يحقق الشهرة والجاه مش ممكن
يكون إنسان.

شخص ٣ : ما تزعليش يا بنتى اللى زى ده ما يتزعلش عليه
منى : أنا زعلانة من نفسى - من غبائى - على حالى
لا طللت دنيا ولا شفت آخرة وادينا متعلقة مش
عارفة مصيرى إيه - أعمل إيه بس يا ربى -
أعمل إيه.

الشخص : سلمى أمرك لله واللى راح راح - المهم اللى جاى
منى : لا - اللى راح عمره ما راح - أنا لازم أنتقم
منه - لازم أعذبه زى ما عزبنى

شخص ٢ : يعنى هتعملى إيه؟
منى : عايزة أرجع الدنيا تانى - عايزة أنزل للدنيا
تانى.

شخص ٣ : مستحيل يا بنتى - اللى بيحى هنا ما بيرجعش

الدنيا تانى.

منى : زى ما ساعدونى وعرفتونى أخبار أحمد:

هتساعدونى أرجع الدنيا تانى.

شخص ٢ : اللى بتطلبية ده المستحيل بعينه

منى : أرجوكم ساعدونى - أنا مليش هنا حد غيركم

- علشان خاطرى ساعدونى - عايزة أنزل الدنيا

تانى - (تبكى) عايزة انزل الدنيا تانى.

الشخص : حتى لو قدرنا نساعدك ونزلك الدنيا تانى -

ده هيفيد بايه

منى : مش مهم - المهم إنى انزل الدنيا تانى وأقابل

أحمد: وانتقم منه - وكمان عايزه أعرف ماما

وبابا عاملين إيه - والناس تحت بيقولوا علىّ

إيه - شايفنى إزاي - غبية ومتهورة ولا ضحية

واضحك عليها.

الشخص : لو كان على كده ده أمره سهل.

منى : أمره سهل إزاي

شخص ٣ : كل ده ممكن تعرفيه من إدارة الإستعلامات

منى : يارب يخليك قولى إزاي

- الشخص : يا أنسه يخليه إزاي - إزاي - ده ميت - ميت .
- شخص ٢ : يا خونا براحه عليها - راعوا برضه انها لسا مستجدة - بصى يا ست منى .
- الشخص : لا بصلى أنا - أنا هفهمك - عندنا هنا فى إدارة الإستعلامات اجهزة وكاميرات بتنقل لينا اللى بيحصل تحت ، وعن طريقها بنعرف أخبار الناس اللى تهمنا وعايزين نعرفها .
- منى : يعنى ممكن أعرف أخبار بابا وماما والناس بنقول عليه إيه .
- شخص ٣ : مش بالظبط ولكن عن طريق جلسة الإستشعار على بعد ممكن نعرف .
- منى : طب يلا بينا نعمل جلسة الإستشعار ديه .
- الشخص : اصبرى يا أنسة لما نحجز الأول ميعاد للجلسة
- منى : وهى ديه كمان بالحجز
- الثلاثة معاً : أمال إيه؟

بـلاک

(يضاء المسرح على ذات الديكور مع تواجد باب متوسط الحجم ويقف أمامه ناس كثيرة) (تدخل منى ومعها الثلاثة

محاولة تخطي الزحام للمرور من هذا الباب).

- راجل ١ : راحه فين يا ست ما تقفى فى دورك.
منى : دور إيه يا حضرة أنا داخله جوه - مش ديه
إدارة الإستعلامات.
راجل ١ : إنت مش حاجزة هم هيندهوا عليك
الشخص : يا أنسة مش أنا قايلك ان هنا كل حاجة بالدور
- فى ميعادها - معلش يا حضرة أصلها مستجدة
شخص ٢ : (لراجل ١) وحضرتك حاجز برضه - يعنى
عندك جلسة استشعار برضه
راجل ١ : لا - أنا عملت الجلسة خلاص وعرفت اللي أنا
عايزه - أنا مستنى واحد صاحبي.
منى : طب وكنت عايز تعرف إيه وعرفته.
راجل ١ : عرفت إنى كنت غبى وأرعن ومنتسرع - عرفت
قيمة المثل اللي بيقول يا بخت من بكانى ولا بكة
الناس عليه ولا ضحكنى وضحك الناس عليه -
يا ريتنى كنت سمعت كلامهم - يا ريتنى كنت
فكرت شوية - بس الغباء له ناسه وأنا من ناسه
الشخص : أيوه يعنى عملت إيه فى دنيتك خلاك غبى

- وارعن ومنتسرع.
- ١ راجل : مه أنا ساعتها مكنتش عارف إني غبي وأرعن
كنت فاكريني ذكي ولماح - كنت فاكرا اننا صح
وكل الناس غلط - بس أنا مكنتش عارف -
مكنتش شايف - الكبر عمانى.
- منى : ايوه يعنى عملت إيه خلاك تخش النار.
- ١ راجل : قولى ما عملتتش إيه - كل حاجة يا ختى
عملتها - كذب وكذبت - خمرة وشربت -
امانة وخذت - سرقة وسرقت - حشيش
وشربت - رشوة وخذت - تزوير وزورت كنت
فاكرانى مش هجى هنا يا ختى - بس جيت -
بس جيت (يخرج).
- ٢ شخص : يلا يا ست منى دول نادوا على اسمك (ثم
يبكى) - الراجل ده فكرنى بحالى - يلا يا ست
منى خلصى علشان نمشى من هنا
- ٣ شخص : ما حالك هو حالنا كلنا - يعنى كلنا فى النار
عياقه - محنا كنا فاكريين إننا هنعيش على طول
من غير مانموت

الشخص : أنا خايف ان الجلسة ديه تعمل فيك زى ما عملت فى أخينا ده بتاع بس جيت وأصبحنا دول منى : استنى بس شوية - عايزة اعرف (لشخص ٢) و انت إيه اللي جابك هنا - وعملت إيه علشان تخش النار.

شخص ٢ : أبداً يا ست منى أنا كنت بصلى وأصوم وأذكى وكنت على طول فى الجامع الوقت بوقته بس كان عندى محل بقاله، وكنت فاهم إن التجارة شطارة يقولوا الرز هيغلى أروح مخزن يقولوا الزيت اروح مخزن الزيت - أى حاجة تغلى أروح على طول مخزنها وبعدين أبيعها بأضعاف تمنها وكسبت كتير - واجوزت كتير - وخلفت كتير - وبعدين مت.

شخص ٣ : يعنى عشت بقال ومت بقال - وإزاي بقال زيك يجبوه مع واحد زى كان مدير بنك مكنتش بتعامل غير مع كبار رجال الأعمال - أسهلهم قروض وأزورهم ضمانات كنت معيش مراتى فى قصر وجايب لكل عيل من عيالى عربية أحدث

موديل - يعنى كنت باشا - ومعايا فلوس كثير
قوى واللى مجننى واحد زى إزاي يموت.

الشخص : يلا يا منى الجلسة هتبدء - الحكايات كثير
مش هنخلص

منى : طب وازت حكيتك إيه؟

الشخص : أنا مليش حكاية - أنا غير الناس ديه كلها
- أنا شهيد - أنا مجاهد فى سبيل الله - أنا
الوحيد المسلم وكل دول كفرة - أنا فجرت نفسى
فى الكفرة دول دفاعا عن الإسلام
منى : اهه كدة أنا فهمت - طب يلا بينا نلحق
الجلسة الأشخاص - يلا بينا.

بالاك

(يضاء المسرح على غرفة بعد الباب، ونرى منى تجلس
أمام رجل ضخم أمامه جهاز كمبيوتر، والثلاثة أشخاص
يقفون خلفها).

الضخم : فيه واحد بيدافع عنك - وماسك فى خناق أحمد
بسببك - لا يعرفك ولا تعرفيه - وهيحبك وتحبيه

- الشخص : إزاي هيحبها وهو ميعرفهاش - طب وإزاي هتعبه بعد ما ماتت.
- شخص ٢ : يمكن هيموت ويجى هنا يحبها
- الضخم : اسمه الأول محمود وأبوه اسمه سامى - صحفى بيدافع عنها من غير سابق معرفة وبسببها هيتحبس ويضيع مستقبله - ومن كان سبب موتك هيكون سبب دماره
- منى : يعنى إيه مش فاهمة حاجة - ومين محمود سامى ده - وليه هحبه ويحبني وليه هيتحبس بسببى وأحمد ليه هيدمره
- الشخص : ما هي باينة أهي - بيقولك صحفى يعنى هيكتب مقالات يدافع فيها عنك.
- شخص ٢ : ومعنى إنه يدافع عنك يعنى لازم يشتم أحمد اللي سبب موتك واشتهر على حسك.
- شخص ٣ : وأكيد يا بنتى أحمد علشان كده هيحبسه ويضيع مستقبله.
- منى : عايزة أرجع الدنيا تانى - عايزة أرجع الدنيا تانى.

- الشخص : مش ممكن يا منى : ماينفعش - لأن لو حتى
نزلتى هتبقى مجرد روح - روح من غير جسد
لا حد يقدر يشوفك ولا حد يقدر يسمعك.
منى : يعنى إيه.
الشخص : يعنى إنت هتشوفى الناس ده صحيح - لكن
الناس لا هتشوفك ولا هتسمعك
منى : مش مهم - المهم أنزل الدنيا تانى
الشخص : بس ده مش سهل
شخص ٢ : أنا عندى فكرة
الشخص : فكرة إيه
شخص ٢ : وأنا واقف على خط وارد المستشفيات أسأل
الطالعين منها على أحمد كان فى ناس منهم
بيجوا ويرجعوا تانى الدنيا على طول.
الشخص : قصدك الناس الترانزيت - آه دول الناس
اللى بيروحوا غيبوبة أو بيموتوا موت اكلينيكي
وبيفقوا تانى أو ينفذوهم الدكاتره فى الدنيا
شخص ٢ : يعنى لو الست منى اتعلقت فى حد من دول
مش ممكن تنزل الدنيا معاه؟

- الشخص : هو ممكن بس هتبقى رحلة صعبة عليها.
- منى : مش مهم - المهم أنزل الدنيا.
- شخص ٣ : خلاص يا بنتى انزلى بس خلى بالك من نفسك
- شخص ٢ : بس ممكن تتبهدى لو نزلت لوحديك - الدنيا
غدارة
- الشخص : خلاص تاهت ولقيناها - أنا هنزل معاها آخذ
بالي منها - وبالمرة أخلص شوية مصالح.
- شخص ٢ : طب افرض نادوا على اسمك وإنت مش هنا.
- الشخص : البركة فيكم تستلمولى السكن بتاعى ولما أرجع
تدهونى
- شخص ٣ : بس خلى بالك منها يا بنى وأول ما تتعبوا
هاتها وتعالى على طول.
- منى : أنا متشكرة - متشكرة أوى - فعلا لسا فى
الإخرة ناس طيبين
- شخص ٢ : يلا اتكلوا على الله تقفوا على خطوارد المستشفيات
وأول ما تشوفوا حد راجع تانى اتشعبطوا فيه.
- الشخص : يلا بينا يا منى : بس فيه شرط لازم أقوله قدام
الجماعة - تسمعى كلامى وتنفديه.

- منى : موافقة - يلا بقى.
شخص ٢ : مع السلامة - مع السلامة
شخص ٣ : مع السلامة يا ولادى ونشوف وشكم بخير
الشخص : يلا يا منى : توكلنا على الله
بلاك

اللوحة الثالثة

يضاء المسرح على ديكور لأحد النوادي وبه شباب وشبات وكثير من الناس، ثم تدخل ومنى الشخص ويدور بينهم الحوار الآتي:

- الشخص : نفسى أعرف إنت جبتينا هنا ليه.
منى : ما هو ده النادي اللي أنا فيه عضوة مع أحمد
الشخص : وهو فين سى أحمد ده.
منى : (تلتف لتبحث عنه بين الموجودين حتى تراهه يدخل وتلتف الفتيات فيتجهوا اليه) أهو ده اللي البنات بتجرى عليه.
الشخص : يعنى - ذوقك مش حلو يا آنسة - أنا أحلى منه بكتير.
أحمد : مش معقولة كدة يا بنات كل ما اروح فى حطة تتلموا عليه كدة
منى : اتلموا عليك ساعة وسكتوا (فى غيظ) يا ما نفسى أغزه ونجيبوا معأنا فوق
الشخص : ما تستعجليش هيجى هيجى - أمال يعنى هيروح فين؟
فتاه ١ : قوللى يا أحمد هو صحيح منى كإنت بتحبك

- وإنت كنت عادى يعنى متحبهاش.
أحمد : يا ماما زى ما قلت قبل كدة أنا لسا ما قبلتش
الحب الحقيقى فى حياتى.
منى : يابنى سيبنى أغزه وناخده معأنا فوق (تحأول
الهجوم عليه دون جدوى)
الشخص : يا آنسة متحوليش إنت مجرد روح يعنى
هوا- هوا- يا منى
فتاة ٢ : قولى يا أحمد: إنت صحيح هتمثل فى السينما
أحمد : يا أحمد: قصدى هم هيلاقوا جان برمبيل زى
فى جمالى أو خفة دى.
الشخص : بدمتك ديه خلقة أو شكل يمثل فى السينما -
سيبنى أنا بقى اللى أغزه.
منى : شفت الخاين الجبان - نفسى أشرب من دمه
فتاة : قرئت مقالة محمود سامى - اللى بيشتمك
فيها يا أحمد.
أحمد : ده إنسان حقود - غيران منى: علشان هو
مفيش حد إنتحر علشانه.
فتاة ١ : بس ده بيقول عليك ندل وجبان ومعدكش إحساس

- أحمد : ربنا يسامحه - هيخش النار - وهيخش
السجن كمان - لأنى هرفع عليه قضية
- الشخص : برضه هو لوحده اللي هيخش النار - عبيط قوى
منى : أنا عايزة أقرأ المقال ده - بس نجيبه منين.
- الشخص : وان جبناه هنمسكه إزاي علشان تقرئيه.
- منى : (تلتفت حولها) بص اهه الجرنال اهه ناس
ماسكينه اهه - تعالى نسمع بيقلوا إيه (يتجهوا
نحو مائدة يجلس عليها شابان وفتاة ويستمعون
لما تقرأه من المقال)
- الفتاه : (تقرأ من الجريدة) أن من يخون حبه يخون
نفسه ومن يخون نفسه يخون المجتمع والناس
- والإنسان الخائن لا يستحق إلا الازدراء وليس
الشهرة والنجومية وأحمد هو عنوان للخيانة
والخسة والندالة -
- منى : صح يا محمود والله ده خاين وندل وخسيس.
- الشخص : طب ما أحنا عارفين - إيه الجديد فى كدة.
- فتى ١ : واضح إن محمود سامى متضايق قوى من أحمد
روميو.

- فتى ٢ : له حق يا أخى - أحمد ده إنسان مغرور
ومتعجرف وعامل فيها دنجوان عصره.
- الفتاة : انتم بتقولوا كدة عشان غيرانيين منه - عشان
ما حدش إنتحر علشانكم.
- فتى ٢ : وهو فى حد يحب حد ينتحر علشانه.
- الفتاة : وهو فيه واحدة ترضى تنتحر علشانكم إنتم يا
معفين (تترك المائدة وتقوم).
- الشخص : (منادياً للفتاة) خدى يا بت - إنت يا مدام -
طب يا آنسة (يحأول اللحاق بها).
- منى : (تمسك بالشخص) تعالى هنا رايح فين -
استنى
- الشخص : عايزة إيه - ماسكانى ليه - شفتى البيت
قالت على دول إيه - أمال لو شافتنى هتقول إيه
- منى : طب وهتشوفك إزاي يا فالح.
- الشخص : أهه صحيح - نسييت.
- منى : يا ترى محمود سامى ده - شكله إيه
- الشخص : هيكون شكله إيه يعنى - أكيد معفن زى
دول - وأكيد أنا أحلى منه.

- منى : مش ممكن اللي زيّه - بالمشاعر ديه - والرجولة والشهامة ديه يكون شكله وحش تفتكر هو بيدافع عنى ليه - وبيكرهه أحمد ليه.
- الشخص : طب وأنا هعرف منين - هو أنا مش لسا نازل معاكى من فوق.
- منى : (تفكر) أنا عايزة أروح لمحمود سامى ده - نفسى أشوفه - يلا بينا.
- الشخص : استنى يا آنسة - تقدرى تقوللى هنروحله فين ده؟
- منى : أكيد هنلاقيه فى الجورنال اللي بيشتغل فيه
- الشخص : وايش عرفك إننا هنلاقيه - ده صحفى يعنى بيلف هنا وهناك.
- منى : يبقى نروحله البيت.
- الشخص : طب وهنعرف منين البيت.
- منى : يا سلام - نسأل عليه يا أخی.
- الشخص : نسأل عليه إزاي - إنت عايزة تجنبنى هو احنا نقدر نسأل أو نكلم حد
- منى : تصدق إنت قفلتنى - أمال هننتقم من أحمد إزاي

- الشخص : إنت بتسألينى ما أنا قلتك فوق - قلتلى مش مهم - المهم أرجع الدنيا تانى.
- منى : نفسى أشوف الإنسان الوحيد اللي بيدافع عنى بالحرارة ديه.
- الشخص : يبقى مفيش غير حل واحد
- منى : إيه - قول بسرعة ربنا يخليك
- الشخص : تانى يخلينى ما أنا قلتك يا آنسة أنا ميت - ميت - هيخلينى إزاي؟
- منى : خلاص يا سيدى ما تزعلش - ربنا يخذك
- الشخص : برضه ما ينفعش - ما ربنا خدنى خلاص - هيا خدنى تانى إزاي
- منى : طب أقولك إيه.
- الشخص : ما تقوليش حاجة - أنا اللي هقولك - الحل الوحيد اننا نروح الجورنال اللي بيشتغل فيه محمود سامى ده ونستنى هناك بقى ساعة - اتنين - يوم - اتنين لغاية ما بييجى.
- منى : طب يلا بينا هو اسمه جورنال إيه
- الشخص : الحقيقة - مش عارف

منى : أيوه صح جورنال الحقيقة - يلا بينا.
بلاك

اللوحة الرابعة

- (يضاء المسرح على ديكور داخل جريدة الحقيقة، وفيه ينقسم المسرح لقسمين إلكبر مكاتب للمحررين والآخر مكتب رئيس التحرير وتدخل منى والشخص على جزء مكاتب المحررين أثناء حوارهم التالى، أما مكتب رئيس التحرير فيجلس فيه رئيس التحرير يتحدث فى التليفون)
- محرر ١ : (للمحرر الثانى) شفت يا أستاذ - مش بقولك محمود سامى ده مش هيحبها البر - أحمد روميو رفع قضية على الجورنال.
- محرر ٢ : أنا طول عمري بقول على محمود ده إن آخرته وحشة ومش هيستنى فى الصحافة كتير.
- محرر ١ : تفتكر رئيس التحرير هيعمل معاه إيه.
- محرر ٢ : يا ساتر يا رب ده راجل شرانى وربنا يستر عليه منه

رئيس التحرير: (يتحدث فى التليفون) يا باشا اطمن - الموضوع ده أنا هحقق فيه بنفسى والمحرر ده أنا هرفده - همنعه خالص من الصحافة - بس سعادتك ماتزعلش نفسك - ومفيش داعى للقضية - واحنا هنراضى سعادتك والله يا باشا - بس افهمنى:

سعادتك القضية ملهاش لازمة - يا باشا - يا
باشا - قفل السكة (يضغط على الجرس بعصبية
ويدخل أحد المحررين) محمود سامى جه ولا
لسا.

محرر ١ : لسا يا فندم.

رئيس التحرير: أول ما ييجى يخشلى على طول - فاهم ولا لأ
محرر ١ : فاهم يا فندم - فاهم (يخرج ويتحدث مع
محرر ٢) وديه كإنت نهاية محمود سامى
الصحفية - (يراقب كل ذلك منى والشخص - ثم
يدخل محمود سامى).

محمود سامى : سلام عليكم يا أساتذة.

محرر ١ : أهلا بالصحفى الهمام اللى مقالاته مكسرة
الدنيا.

محرر ٢ : آه مقالاته مكسرة الدنيا - ورئيس التحرير
هيكسر دماغنا.

محرر ١ : ادخل بسرعة يا أستاذ محمود - رئيس التحرير
عايزك (تتحرك منى تجاهه ومعها الشخص).

منى : (تتامله) باين عليه شهيم ومحترم وكمان وسيم

- وسيم جداً.

الشخص : يعنى - مش قوى كدة - لو اتاملتتى ملامحى

هتلاقينى أنا أو سم منه بكتير

محمود سامى : استر يا رب - عايزنى فى إيه يا ترى؟ (يتجه

لغرفة رئيس التحرير ويتبعه منى والشخص)

منى : شفت - أكيد هيبهدله ويمكن يرفده

الشخص : يستاهل زى ما بهدلنا معاه (يدخلون غرفة

رئيس التحرير)

رئيس التحرير: إنت جيت يا أستاذ - جيت يا نصير

المنتحرات - جيت يا صحفى التلاتة منك بقرش

منى : بقى هو التلاتة منه بقرش يا مفش يا أبو كرش

الشخص : يا منى: مليكيش دعوة بيه - ده راجل شرانى

محمود سامى: فيه إيه بس يا فندم - سعادتك زعلان ليه

رئيس التحرير: زعلان ليه - مش عارف يا فندى زعلان ليه

محمود سامى: حصل إيه بس يا فندم

رئيس التحرير: اللى حصل حصل يا أستاذ - إنت مالك إنت -

هه - مالك إنت بلى ينتحر واللى ما ينتحرش

- إنت مالك يا أستاذ.

محمود سامى: يا فندم أنا قلت وجهة نظرى فى الموضوع
رئيس التحرير: وجهة نظرك ديه يا أستاذ هتخرب بيتك
وبيتى.

محمود سامى: يا فندم أحمد ده إنسان جبان - استغل موت
الإنسانة اللى حبته علشان يحقق أغراضه الدنيئة
رئيس التحرير: ما هى برضة إنسانة تافهة وغبية علشان
تنتحر علشانه.

منى: أنا تافهة وغبية يا راجل يا مفش - شايف
بيقول عليه إيه.

الشخص: هو طبعا عنده حق اللى عملتيه ده تافهة وغباء
منك.

منى: كدة متشكرة قوى - واللى إنت عملته كان
إيه - أنا شهيد - وهو فى شهيد بيخش النار
- عرفت مين فينا التافه والغبى.

محمود سامى: أنا معاك ان منى غلطت فى اللى عملته
واتسرعت فى قرارها بس ده معناه إنها إنسانة
حساسة ورقيقة وضحت بنفسها علشان حبها.

منى: شفت يا شهيد الغباء بيقول علىّ إيه - بحبك

- يا محمود - بحبك يا أبو حنف - (تقفز في محاولة منها لاحتضان محمود دون جدوى) آه لو كنت شفتك قبل الجبان أحمد.
- الشخص : آه دنتي نازلة من فوق علشان تحبى واحد تانى - ويا ترى هتنتحري علشانه برضه
- منى : عمرى ما تخيلت إنى هلاقى إنسان يحبنى ويدافع عنى من غير ما يشوفنى.
- الشخص : مش يمكن يكون وصولى وإنتهازى وبيعمل كدة علشان يشتهر هو كمان
- منى : معتقدش إن إنسان بالأخلاق ديه والنبيل والشهامة ديه يكون بالشكل ده.
- الشخص : على العموم ادينا هنتفرج ونشوف.
- منى : يعنى إيه مش هنقدر نعمله حاجة.
- الشخص : ومن امتى الميتين يقدرُوا يعملوا للأحياء حاجة يا منى يلا بينا بقى.
- منى : على فين.
- الشخص : نطلع فوق بقى - مش شفت أحمد واطمنت إن فى واحد بينتقملك منه.

منى : طب وإنّت مستعجل ليه.
الشخص : لو فوق ندهوا اسمى هيروح عليه الشقة
المطرحين وعفشة المية.
منى : إنّت مش موسى صأحبك يستلمهالك.
الشخص : خايف يطمع فيها لنفسه والآخرة ما تضمنش
محمود سامى : يعنى إيه يا فندم.
رئيس التحرير : يعنى اتفضل يا أستاذ ما تجيش الجريدة إلا
وإنّت ناھى الموضوع ده مع اللى اسمه أحمد روميو
محمود سامى : بس يا فندم أنا هعمل إيه معاه.
رئيس التحرير : ده شغلك يا فندى مش شغلى - اتفضل روح
خلص الموضوع.
محمود سامى : بس أنا مش هقدر اعتذره يا فندم.
رئيس التحرير : يبقى هيحبسك يا أستاذ وهيحبسنى معاك.
محمود سامى : لا - أنا هدافع عن نفسى وربنا إن شاء الله
هينصرنى ويظهر الحق.
رئيس التحرير : يبقى اعتبر نفسك مرفود يا أستاذ، ولما ربنا
ينصرك نبقى نشوف هنعمل إيه.
منى : (تهجم منى على رئيس التحرير تضرب فيه

دون جدوى) طب ان ماورتكش يا أبو كرش إنت
- أنا هوريك (يخرج محمود سامى من غرفة
رئيس التحرير فى خطوة جنائزية، وخلفه منى
والشخص ويسلم على المحررين واحد واحد).
واحنا هنسيبه كدة مش هنعمله حاجة.

الشخص

: ولا نقدر نعمل حاجة.

: بس احنا لازم نساعده - نساعده بأى شكل
واى طريقة

منى

الشخص : ما نقدرش يا منى : ما نقدرش - احنا مجرد
أرواح - عدم - ملناش أى وجود مادى علشان
نقدر نساعده

منى

: بس تعالى نحصله ونشوف هيعمل إيه

الشخص : يلا ياختى ما أنا أستاهل - ما كنت قاعد فوق
مستنى دورى ومرتاح (يخرجان).

بلاك

اللوحة الخامسة

يضاء المسرح على مكتب الأستاذ الغندور المحامى نفس
الديكور السابق مع تغيير بسيط.
فيكون مكتب رئيس التحرير هو مكتب الأستاذ وقاعة
المحررين هي قاعة الإنتظار ومكتب الوكيل
وكيل المكتب: (يدخل على جرس التليفون) الو - الو -
ايوه هنا مكتب الأستاذ الغندور المحامى نعم
- نقوله مين - بس الأستاذ مشغول دلوقتى
مش فاضى - لو عندك استشارة قانونية أو أى
حاجة أنا تحت أمرك يا سيد - نعم - أنا مين
- محامى مع الأستاذ فى المكتب - لا يا سيد أنا
وكيل المكتب (أثناء ذلك يدخل ومحمود ومنى
والشخص) خبرة ثلاثين سنة وضيع فى القانون
والاستشارات القانونية - نعم بتقول إيه أنا
اتنيل - طب اقفل السكة من فضلك - اقفل
السكة (يقفل التليفون وهو ثائر) أنا اتنيل -
طب اتنيل ليه (موجها حديثه لمحمود سامى)
علشان ما أنا مش محامى وهى المحاماه ديه إيه
مش خبرة مش ممارسة وأنا إيه مش بقالى ثلاثين

سنة وكيل محامى ، يعنى خبرة وبروح المحكمة
كل يوم يعنى ممارسة - هو يعنى اللى هيقله
الأستاذ مش هعرف أقوله - وهو الأستاذ بيقل
حاجة من غير ما ياخذ رأيي.

محمود سامى : الأستاذ موجود.

وكيل المكتب : مين سعادتك

محمود سامى : قوله محمود سامى الصحفى.

وكيل المكتب : طب اتفضل إرتاح وأنا هديله خبر.

منى : الوكيل ده شكله أنتيكة قوى.

الشخص : ملكيش دعوة بيه يا منى ده باين عليه راجل
غلبان.

منى : غلبان فى مخه.

الشخص : اسم الله على مخك - شفت بمخك النور عملت

إيه فى الغلبان ده.

وكيل المكتب : اتفضل يا أستاذ.

محمود سامى : (يتجه لمكتب الأستاذ وخلفه منى والشخص

ويدخل) سلام عليكم يا أستاذ غندور.

الأستاذ : أهلا يا أستاذ محمود يا صاحب المقالات

العظيمة والمواقف النبيلة - افضل اقعد.

محمود سامى: يعنى سعادتك قريت اللى أنا كتبتة عن أحمد

روميو

الأستاذ : وهو فى حد فى البلد ماقراش اللى إنت كتبتة

الشخص : شفتى يا آنسة فضحتك بقت بجلاجل

منى : يعنى إيه جلاجل.

الشخص : يعنى فضيحة مجلجلة.

محمود سامى: أهو هو ده الموضوع اللى أنا جايلك عشانه يا

أستاذ.

الأستاذ : قصدك إن أحمد روميو رفع عليك قضية.

منى : آه يا أستاذ والنبي تعمل حاجة الله يخليك.

محمود سامى: وبيطالب بمليون جنيه تعويض وحبسى.

الأستاذ : التعويض اللى هتدفعه الجريد.

محمود سامى: لا ما هى كمان الجريدة رفتدنى.

الأستاذ : مسكين يا أستاذ.

منى : آه والنبي مسكين خالص مش كدة يا أستاذ.

الشخص : دنا اللى مسكين - هو ده اللى هيخلصه - ده

بيتصعب عليه من دلوقتى.

- محمود سامى : يعنى إيه يا أستاذ مفيش أمل
الأستاذ : إلامل ضعيف يا أستاذ محمود إلا إذا.
منى : إلا إذا إيه يا أستاذ - انطق.
الشخص : إلا إذا ضحينا بالمتهم والجريدة علشان ننقذ
رئيس التحرير - انطق يا أستاذ إلا إذا.
الأستاذ : إلا إذا اثبتنا للمحكمة إن فعلا كان فى علاقة
حب بين أحمد ومنى والإثنين فعلا اتفقوا على
الإنتحار وأحمد خلى بيها.
منى : ينصر دينك يا أستاذ إلا إذا.
محمود سامى : وطب نثبت ده إزاي ينفع بشهادة الشهود
منى : أيوة - مبروك يا محمود - كل الناس اللى
بيعرفونا يشهده بكدة
الشخص : وأنا كمان اشهد بكدة
الأستاذ : معتقدش إن شهادة الشهود تنفع فى الحالة
ديه؛ لأننا لو إحنا جبنا اتنين شهود هو هيجيب
عشرة ودول هيبقوا ضد دول.
منى : يعنى إيه.
الشخص : يعنى إيه.

- محمود سامى : يعنى إيه.
الأستاذ : يعنى لو قدرنا نقدم للمحكمة دليل مادى يكون أحسن.
منى : دليل مادى إزاي يعنى.
الشخص : دليل مادى إزاي يعنى
محمود سامى : دليل مادى إزاي يعنى
الأستاذ : جوابات - صور - حاجة زى كدة يعنى.
منى : (بفرحة) الجوبات والصور موجودة - موجودة يا أستاذ - موجودة يا محمود.
الشخص : مدام موجودة يبقى مفيش مشكلة - بس هنجيبها إزاي هى ديه المشكلة.
منى : الجوبات والصور موجودة يا محمود - أنا شيلاها وعارفة مكانها.
الشخص : ويفيد بإيه يا ندم - قصدى يا منى هنجيبها إزاي وندهالوا إزاي.
الأستاذ : لو قدرت تحصل على الحاجات ديه اقدر اقولك مبروك البراءة من دلوقتى.
منى : براءة - براءة.

الشخص : والبراءة هتيجى إزاي يا أنسة واحنا مش فى
إيدنا حاجة.

محمود سامى : ان شاء الله ربنا يقدرنى واجيبها (يقف) سلام
عليكم يا أستاذ.

الأستاذ : مع السلامة - بس حأول تجيبهم قبل الجلسة
منى : يلا بينا نروح البيت ندور على الحاجة.

الشخص : إنتى عايزة تجننى نروح إزاي ونجيب الحاجة
إزاي إنت ناسية احنا منقدرش نمسك حاجة أو
نجيب حاجة - إحنا هوا يا منى هوا.

منى : طب بس يلا واللى عايزه ربنا يكون (يخرجان)
بالاك

اللوحة السادسة

(يضاء المسرح على ديكور منزل منى: نفس الديكور السابق - مع تغيير طفيف فيكون الجزء الكبير صالة المنزل والآخر هو غرفة منى وعلى الحائط صورة منى عليها شريط اسود وساعة حائط تدق أثناء دخول منى والشخص).

الشخص : (يستخبي خلف كرسي عند سماع دق الساعة)

استخبي لاصحاب البيت يشفونا.

منى : اطلع يا نبيه - هيشفونا إزاي.

الشخص : آه صحيح - نسيت - هو ده بيتكم - ودى

طبعا اكيد صورتك.

منى : طبعا - واللى هناك ديه أوضتى (يتجهان الى

الغرفة).

الشخص : (يتفحص الغرفة) مش بطالة - فين بقى

الجوبات والصور؟

منى : هنا فى الدولاب ده أنا شيلاهم فى مخابأ سرى

جوه الدولاب.

الشخص : فالحة يا ختى لا احنا هنقدر نجيبهم ولا حد

هيقدر يلاقهم

منى : يعنى إيه - يبقى دليل البراءة قدمنا ومش

- قادرين نمد إيدينا نجيبه.
- الشخص : إيدنا - هي فين إيدنا دي - احنا هوى - هوى يا منى.
- منى : طب والحل هنعمل إيه؟
- الشخص : مش عارف ديه اصعب مهمة قابلتني في آخرتي (يدق جرس الباب).
- والدة منى : ايوه مين - حاضر جاية اهه (تدخل الصالة مع خروج منى والشخص من الغرفة).
- الشخص : مين ديه.
- منى : ديه ماما - يا حبيبتى يا ماما (تحاول إن تحضنها دون جدوى).
- والدة منى : (تفتح الباب) أهلاً وسهلاً مين حضرتك - اتفضل.
- محمود سامى : (يدخل) أنا محمود سامى الصحفى وعايز أقابل والد المرحومة منى.
- والدة منى : صحافة تانى - يا بنى حرام عليكم - سيبونا فى حالنا بقى - مش كفاية اللي حصلنا.
- منى : لا يا ماما - مش كدة - ده هو ده اللي بيدافع عنى.

محمود سامى : لا يا فندم حضرتك فهمتني غلط أنا جاى علشان حاجة تانية خالص.

الشخص : معلش يا ميدو ما إنت أصلاً داخل غلط.
والدة منى : عموما اتفضل يا بنى - هندهولك حالا - يا ابو منى - يا كابتن - فى ضيف عايزك.

منى : الحمد لله - أهو محمود جه وأكيد هيخليهم يدورا على الجوابات والصور وهيطلع براءة.

الشخص : الكلام ده يا ختى لو مكنتيش مخبياهم فى الدرج السرى جوه الدولاب.

منى : يعنى إيه.
الشخص : يعنى ممكن يقبلوا الدولاب وبرضه ميلقوهاش
منى : طب والحل - هنعمل إيه - يبقى الدليل قدام عيننا ومش عارفين نجيبه.

والد منى : (يدخل) أهلاً وسهلاً يا أستاذ محمود.
محمود سامى : أهلاً وسهلاً يا فندم - أنا فى الحقيقة كنت عايز أتعرف على سعادتك من زمان.

والد منى : إنت إنسان شهم يا أستاذ محمود - بتدافع عن بنتنا من غير ما تشوفها ولا تعرفها.

محمود سامى : فى الحقيقة يا فندم أنا بدافع عن الحق وبكشف للناس إنتهازية ووصولية أحمد

والد منى : هو يعنى هيطلع لمين - أكيد هيطلع لأبوه وصولى وإنتهازى زيه - تعرف يا أستاذ محمود لولا ابو أحمد كان زمانى دلوقتى لاعب كورة مشهور وكان زمانى دلوقتى أنا - اللى بدرب الفريق القومى - تعرف يا أستاذ ---

محمود سامى: (مقاطعا) أنا فى الحقيقة جاى النهاردة علشان-----

والد منى : زمان يا أستاذ محمود كنا عاملين فريق كورة وكنت أنا الكابتن بتاعه - وكان والد أحمد مجرد لفت باك فى الفريق بتاعى

محمود سامى: (مقاطعا) يا كابتن أنا عايز أقول -----

والد منى : وقعد والد أحمد يتدحلب ويعصى الفريق عليا - لغاية ما بقى هو الكابتن - وأنا وقفونى جون كيبير - بس أنا-----

محمود سامى: يا حاج ممكن تسمعنى - أنا عايز اقول ---

والد منى : ومع ذلك ورغم إن كنت واقف جون خدنا
دورى الحوارى - يقوم الندل ياخذ قرار---

محمود سامى : طب تسمحلى أستأذن أنا (يقف)

والد منى : بس أنا ما سيبتوش تنى وراه لغاية -----

منى : يا بابا - يا بابا اديلوا فرصة يكلم - حرام
عليك

الشخص : هذا الأب وتلك إلابنه - وأنا طار فوق عش
المجانين - هو ده أبوكى؟

محمود سامى : (متجها لباب الخروج) يا عمى - اسمعنى -
أحمد هيحبسنى

والد منى : وإيه يعنى ما أنا مرة حبست أبو أحمد فى
الكورنل وجبت فيه جون لما سبت الفرقة ولعبت
مع الفرقة الثانية

الشخص : أنا عايز أعرف إنت إنتحرتى علشان أحمد ولا
علشان أبوكى

محمود سامى : ممكن تسكت خالص وتسمعنى.

والد منى : ما تكلم يا بنى ما أنا ساكت من الصبح - قول
عايز إيه.

محمود سامى: أنا هتحبس لو مقدمتش للمحكمة أى صور
أو جوابات بين منى وأحمد والحاجات ديه هي
دليل براءتى الوحيد.

منى : ايوة يا بابا الحاجات ديه فى الدرج السرى
اللى جوه الدولاب.

والد منى : صور إيه وجوبات إيه يا أستاذ - أنا بنتى
مش بتاعة الحاجات ديه.

الشخص : عاجبك كدة - أهه أبوكى طينها على دماغ
الراجل.

محمود سامى: يا عمى - أرجوك حاول تفهمنى أنا فى ورطة
ومحتاج تساعدينى.

والد منى : صدقنى يا أبنى لو كان فى حاجة زى كدة كنا
لقيناها وأنا بنفسى إنتقمت منه ومن أبوه.

منى : يا بابا دور كويس اعمل معروف - الحاجة
هنا فى الدولاب - قصدى فى الدرج السرى.

محمود سامى: أنا آسف يا عمى - كان عندى أمل أثبت للناس
كلها براءة منى وإنتهازية أحمد.

والد منى : صدقنى يا بنى - مفيش اى حاجة هنا -

- وأوضة بنتى اهه - خش دور بنفسك
محمود سامى : مفيش داعى - أنا مصدق حضرتك
الشخص : (يدفعه لغرفة منى) ما تخش يا أخى يمكن
تعتر فى الدرج السرى بتاع الدولار
منى : (تدفع الشخص الذى يدفع محمود دون جدوى)
خش يا محمود يمكن تعرف تطلعهم
محمود سامى : أنا آسف يا عمى على الإزعاج - سلام عليكم.
والد منى : مع السلامة يا بنى - أسمع أنا نسيت أقولك
(محمود يخرج) لما أبو أحمد بقى عمل كدة
(موسيقى مع اطفاء جزء الصالة وأنارة غرفة
منى والتي يذهب إليها منى والشخص).
منى : وبعدين هنعمل إيه؟
الشخص : مش عارف - أنا مش قولتلك واحنا فوق -
مش هنقدر نعمل حاجة.
منى : بقى يا ربى دليل البراءة قدامنا ومش عارفين
نجيبه.
الشخص - علشان تحرمى تاكلى جلاس وتنتحرى علشان
واحد هجاص - مفيش فائدة يلا بينا.

- منى : أنا مش منقولة من هنا من جنب الدولار لغاية
ما تتطلع الحاجة ديه
- الشخص : يا بنتى اسمعى الكلام - زمانهم ندهوا على
اسمى والشقة هتروح عليه.
- منى : ما هو يا أنا يا الدولار (تحاول فتح الدولار
بعنف).
- الشخص : علشان تحرموا تخبوا حاجتكم فى درج سرى
جوه الدولار.

بلاك

اللوحة السابعة

(يضاء المسرح على ديكور لقاعة محكمة مع تواجد ناس فى القاعة يجلسون ومنصة للقضاء وقفص للمتهمين يقف داخله محمود ويقف بجوار القفص منى والشخص ويجلس مع الجمهور أحمد ومحاميه ويقف بجوار القفص وكيل المحامى يتحدث مع محمود سامى).

وكيل المحامى - اطمن يا أستاذ محمود المتر بتاعنا متين قوى وهتطلع براءة باذن الله.

محمود سامى : هطلع براءة إزاي واحنا معناش دليل البراءة.

منى : يعنى محمود هيروح مننا واحنا عارفين مكان الدليل ومش قادرين نجيبه.

الشخص : أدى الله - وأدى حكمته.

منى : يعنى مش هنقدر نساعده.

الشخص : وهو من امتى إلاموات بيقدروا يساعدوا الأحياء

منى : يعنى إيه - محمود هيتحبس بسببى - أعمل

معروف حأول - لو اتحبس مش هسامح نفسى أبداً.

الشخص : ماتعترضيش على إرادة ربنا يا منى إحنا

مفيش فى إيدنا حاجة.

وكيل المحامى: المتر اتاخر قوى الجلسة هتبدأ واحنا نمره
واحد فى الرول

محمود سامى: والمتر هيعمل إيه من غير الدليل (يدخل
الحاجب)

الحاجب : محكمة (يدخل القاضى ووكيل النيابة ويجلسون
على المنصة فيقف من فى القاعة).

القاضى : اتفضلوا (يجلس) انده رول واحد.
الحاجب : محمود سامى.

محمود سامى: (يرد) افندم (يقف وكيل المحامى امام القاضى
وهو يرتعش).

وكيل المحامى: أنا - أنا وكيل الأستاذ الغندور المحامى -
وب ب بطلب من سعادتك التأجيل لآخر الرول
- لحد ما ييجى الأستاذ

القاضى : وهى المحكمة فاضية تستنى الأستاذ بتاعك -
المدعى بالحق المدنى موجود

محامى المدعى: أيوه يا فندم - أنا حاضر مع المدعى بالحق
المدنى الأستاذ أحمد.

أحمد : (يقف) وأنا المدعى أحمد روميو - وعايز أقول

يا سيادة القاضى إن الراجل ده (يشأور على محمود
سامى) شتمنى وبهدلنى على صفحات الجرايد -
وأنا عايزك تحبسه وتدينى تعويض مليون جنيهه
- علشان هو ببيغير منى بس هيه.

القاضى : طب اسكت وخلي المحامى بتاعك يتكلم.
أحمد : والمحامى بتاعك يتكلم ليه - أنا صاحب
القضية - وأنا اللى لازم أتكلم.

وكيل المحامى : وبعدين يا أستاذ - سيب المحامى بتاعك هو
اللى يكلم - القانون كدة - لما كل واحد يجى
يكلم - أمال المحامين تعمل إيه - تقعد تتفرج
- ووكلاء المحامين يعملوا إيه - عيب يا أستاذ
اسمع كلام المحكمة وسيب المحامى يكلم.

القاضى : وانت مين أذنك تكلم.
وكيل المحامى : أنا وأنا وكيل مكتب الأستاذ الغندور المحامى
يا سسسيادة القاضى - اللى حاضر عن المتهم.

القاضى : لو اكلمت تانى هحطك فى القفص - فاهم ولا
لا.

وكيل المحامى : ففاهم يا ريس ففاهم.

المحامى : سيدى الرئيس إن المتهم الماثل أمام عدلكم قد
اعتدى على موكلى بالنسب والقذف.

أحمد : آه يا سيادة القاضى - شتمنى وقذفنى وسبنى
- علشان غيران منى ، وأنا عايز تعويض مليون
جنيهه وتحبسه.

القاضى : أنا مش قلتلك اسكت وسيب المحامى بتاعك
هو اللى يتكلم ،

وكيل المحامى: ناس جاهلة بالقانون يا سيادة القاضى
مايعرفوش إن المحامى هو اللى لازم يتكلم مش
هما - وما يعرفوش إن وكيل المحامى هو كل
حاجة فى المكتب - هو اللى بيحضر - وهو
اللى بيكتب - والأستاذ يا دوب هو اللى بيترافع
القاضى : يا عسكرى حط الراجل ده فى القفص.

وكيل المحامى: حرمت يا ريس - آخر مرة - مش هكلم تانى
- عمرى ما هكلم تانى - بقالى ثلاثين سنة نفسى
أكلم واترافع وأجلجل - بس خلاص مش هكلم
ومش هترافع - بس ما تحطنيش فى القفص ربنا
يخليك.

القاضي : طب ما تكلمش تانى خالص فاهم ولا (للمحامى)
اتفضل يا أستاذ
المحامى : إن قانون العقوبات قد نصَّ سيدي الرئيس على

أحمد : يا عم قانون عقوبات إيه - خش فى الحبس
على طول - يا سيادة القاضي - ويا حضرات
المستشاريين - المسألة مش محتاجة قانون -
واحد شتم واحد يتحبس ولا لا هي كيميا -
وعلشان كدة أنا أطالب بإعدام المتهم شنقاً أو رمياً
بالرصاصة حيث إنه قتلنى رمياً بالكلمات، والله
على ما اقوله شهيد.

وكيل المحامى : أحسنت يا أستاذ - إيه البلاغة والعظمة ديه
أحمد : شكراً شكراً - والسلام عليكم ورحمة الله
القاضي : يا عسكري - حط إلاتنين دول فى القفص -
المدعى ووكيل الأستاذ الغندور.

أحمد : خلاص يا ريس مش هترافع تانى.
وكيل المحامى : ده هو اللي اترافع يا ريس مش أنا.
القاضي : حكمت المحكمة بحبسهما أربعة وعشرين
ساعة

الشخص : يحيا العدل.
منى : يحيا العدل.
القاضى : اتفضل يا أستاذ.
المحامى : إن قانون العقوبات سيدى الرئيس فى المادة
رقم ---

أحمد : (من داخل القفص) ياعم بلا خيبة بقى -
أجيبك تحبس المتهم - تقوم تحبسنى أنا وتقولى
قانون العقوبات - يا سيادة القاضى أنا المدعى
وحضرتك غلطت وحبستنى أنا والمتهم اهه
جنبى والمفروض يعنى تحبسه هو مش أنا.
وكيل المحامى : وأنا وكيل الأستاذ الغندور المحامى وحضرتك
حبستنى والقانون يحمينى ويحمى موكلى -
وأنا بعترض على الحبس واستأنف.

القاضى : يا أستاذ محمود جايب محامى ولا هتدافع عن
نفسكز

أحمد : طب واشمعنى هو يدافع عن نفسه وأنا لا وهو
المتهم وأنا المدعى
محمود سامى : أنا هتدافع عن نفسى.

وكيل المحامى: حاضر مع المتهم يا ريس والمتهم برئ حتى
تثبت إدانته - وانى أتساءل أين هي القضية
هه - اين هي - اننى لا ارى قضية - إنما أرى
مدعى يدعى ظلماً وعدواناً على موكلى - لذلك
أرى سيدى الرئيس حضرات المستشارين حبس
المدعى وبراءة موكلى وانى-----

أحمد : الله وأكبر ويحيا العدل - إيه المرافعة الحلوة
ديه - شايف يا أستاذ مش تقولى قانون العقوبات
- (للكيل) مكتبك فين يا أستاذ علشان أجيبلك
القضية.

القاضى : يا عسكرى خد إلاتنين دول نزلهم الحبس
أربعة وعشرين ساعة.

أحمد : يا باشا أنا المدعى - المتهم أهه - يا عسكرى
باشا فى غلطة ده المتهم مش أنا.

وكيل المحامى: نزل ايدك يا عسكرى - أنا رجل قانون - أنا
وكيل محامى - بلد شهادات صحيح.

القاضى : هدوء فى القاعة - اتفضل يا محمود قول
دفاعك

محمود : أنا صحيح معنديش دليل البراءة لأنى مقتدرتش اجيب الصور والجوابات اللى تثبت العلاقة بين منى وأحمد، لكن أنا كتبت الكلام ده لانى حسيت ان الإنسانة اللى تنتحر علشان حبها تبقى إنسانة كلها مشاعر وأحاسيس جميلة - واللى تضحى بنفسها علشان حبها حرام ن ظلمها ونقول عليها الكلام اللى قاله المدعى إنه ماكانش يعرفها وماكانش بيحبها وانه مفيش علاقة بينهم.

منى : بحبك يا محمود - بحبك قوى يا أبو حنفى.
الشخص : أبو حنفى - إنت إيه قلبك اتوبيس بيحب فى كل محطة.

محمود : علشان كدة أنا كتبت وقلت إن أحمد خان حبه واللى يخون حبه يخون مجتمعه والناس والخاين ما ينفعش يبقى نجم وقضوة للشباب والبنات.

القاضى : وطب تفتكر يا محمود إن الإنسانة اللى تنتحر وتضيع شبابها واخرتها علشان واحد هايف زى

ده تستاهل إنك تدافع عنها، وتعرض نفسك
للسجن علشانها.

محمود سامى : أنا معاك يا حضرة القاضى إنها إنسانة فى حد
ذاتها تافهة وغبية علشان تنتحر علشان واحد
زى أحمد.

منى : أنا تافهة وغبية يا محمود - طب يا رب
يحبسوك.

الشخص : يسلم فمك يا أبو حنف

محمود سامى : بس بصرف النظر عن تفاهتها وغبائها - هي
كلها مشاعر وأحاسيس ومش من الشهامة ولا
إلاخلاق إننا نستغل إنتحارها، ونشتهر على
حساب شرفها وسمعتها يبقى فين الأخلاق
والشرف والضمير.

محمود : ربنا يخليك ليا يا محمود

الشخص : يخليه اه - بس مش ليكى يا منى

القاضى : وطب تثبت إزاي يا محمود للمحكمة إن اللى
كتبتة ده صحيح مش كذب وإن فعلا المدعى عمل
كده.

محمود سامى : هى ديه المشكلة يا حضرة القاضى ان مقدرتش
أحصل على الدليل المادى.

منى : بس أنا أهو يا حضرة القاضى - أنا اللي أحمد
ضحك عليا واستغل إنتحارى لمصلحته أنا الغبية
التافهة اللي ضيعت نفسها وضيعت محمود
معها - بصلى يا حضرة القاضى مكنتتش عارفة
إن قرار الإنتحار كان أغبى قرار خدته فى حياتى
- أنا اللي اتسرت فى قرارى ومفكرتش كويس
وضيعت به دنيتى وآخرتى - أنا حتى لما مت
لا عارفة أخش الجنة، ولا عارفة حتى أخش
النار - أنا غبية وتافهة احبسنى أنا وبلاش هو
(يستمر كلام منى مع تلاشى الإضاءة واثناء (البلاك)
حتى يتم تغير الديكور إلى ديكور مستشفى ومنى نائمة على
السريير وحولها والدها ووالدتها وبعض إصدقاء) أنا المتهمه
الحقيقية يا حضرة القاضى - أنا اللي لازم اتحاكم مش
محمود - احبسنى أنا وبلاش هو - احبس بابا اللي معرفش
يربينى - واحبس ماما اللي دلعتنى ولبلتلى كل طلباتى -
احبسنى أنا وهما وبلاش محمود - سامحينى يا محمود

- (يضاء المسرح) سامحيني يا حبيبي - سامحيني يا محمود
والدة منى : منى - منى إنت فقت - الحمد لله - الحمد لله
والد منى : منى فاقت يا دكتور - منى فاقت (يسرع
لمناداته) منى فاقت يا دكتور
منى : إيه ده - أنا فين - ماما - أنا فين وإيه المكان ده
والدة منى : حمدلله على سلامتک يا منى الحمد لله
والد منى : (يدخل ومعه الطبيب) حمدلله على سلامتک يا
بنتى - ألف حمد لله على سلامتک
منى : بابا أنا فين - أنا صاحبة ولا ميته
والد منى : صاحبة يا حبيبتي - والحمد لله إنك قمتي
بالسلامة.
منى : يعنى أنا عايشة مامتش.
والدة منى : عايشة يا بنتى مامتيش ولا حاجة - واديكى
معأنا أهه.
الدكتور : حمدالله على السلامة يا منى (يقيس لها
النبض)
منى : (تنظر للدكتور فى دهشة) الله يسلمك يا دك
--- مين إنت متحبستش

- الدكتور : عايضة تحبسينى - الله يسامحك.
والدة منى : ده الدكتور محمود اللي أنقذ حياتك يا منى
وعملك غسيل معدة.
منى : مش ممكن - إنت محمود سامى الصحفى اللي
كنت بتدافع عنى.
الدكتور : أنا فعلا كنت بدافع عنك بس ضد الموت والحمد
الله ربنا نجاكى
منى : يعنى أنا ممتش وما رحتش الآخرة.
الدكتور : اخرة إيه بس يا منى منتى اهه فى الدنيا يا
حبيبتى.
منى : (موسيقى رومانسية) حبيبتك
الدكتور : (خجلاً) آه طبعاً حبيبتى.
منى : (بكسوف) إنت مرتبط يا دكتور.
الدكتور : لا بس فى ناس مكلمين عليا.
منى : يا ترى مين هما الناس دول.
الدكتور : (بكسوف) اسألني عمى وهو هيقولك.
والد منى : لو موافقة يا منى الدكتور مستعجل علشان
مسافر بعثة بعد شهر.

- منى : قصدك يعنى ان الدكتور عايز يج - ----
الدكتور : أيوة يا منى : وهكون اسعد واحد فى الدنيا لو
وافقتى على إنك تتج----
منى : موافقة جداً - موافقة خالص - موافقة بشدة.
والد منى : ألف مبروك يا ولاد - ألف مبروك.
والدة منى : ألف مبروك يا بنتى - مبروك يا دكتور.
منى : طب - بس - أنا عايزة أسأل سؤال.
والدة منى : خير يا حبيبتي - أسألي.
منى : هو أحمد عمل إيه.
الجميع : تانى.

بلاك

(ثم يضاء المسرح على مشهد الجنة والنار مرة ثانية ونجد
نفس الزحام ونرى أحمد.

ملابس بيضاء ويتجه ناحية الزحام حول جهنم)

أحمد : إيه ده - وإيه الزحمة ديه - وإيه المكان
الغريب ده (يشاور للشخص) بس - بس بس
إنت - أيوه إنت.

الشخص : أوامر يا جميل - أفندم - نعم - هو مفيش هنا

غيرى ولا إيه.

أحمد : إحنا فين.

الشخص : نعم يا حبيبي - مش عارف إحنا فين - أمال

جيت هنا إزاي؟

أحمد : مش عارف جيت إزاي - أنا آخر حاجة

فاكرها إنى شربت سم - وبعد كدة حصل إيه

مش عارف (يظهر شخص ٢ وشخص ٣) أصل

أنا كنت بحب منى واتفقنا على الجواز أم أبوها

وأبويا مارضيوش أم أنا ومنى اتفقنا على الانتحار

ال علشان حبنا يعيش

(موسيقى الفنال أثناء كلام أحمد مع اسدال الستار ببطء)

النهاية
